

Passagi daspö 100 ons

Giubileum senda dal Quar a Sent ed in Val d'Uina

DAD ANNETTA ZINI / ANR

■ Dal 1910 es gnü inaugurà ün passagi da passa 1000 meters lunghezza tanter l'Engiadina Bassa ed il Vnuost. Ingon as poja festagiari quista senda dal Quar cun ün'exposiziun a Sent e cun üna spassegiada in Val d'Uina. L'on 1908 es gnüda datta la prüma palada per realisar quista senda. L'iniziativa es gnüda da la secziun Pforzheim dal Club Alpin Tudais-ch/Austriac chi vaiva fabrichà üna chamonna illa regiun dal Pass da Schlingia. Il böt d'ei-


ra da fabrichar ün traget main privlus e plü simpel. Per commemorar quista grondiusa lavur vain organisada quista stà üna festa a Sent ed in Val d'Uina. Per prosma fin d'eivna prepara la Grotta da cultura da Sent ün'exposiziun chi düra bundant ün mais.

Gronda variaziun a l'exposiziun

Quista vernissascha spordscha be che chi's voul, co cha *Cla Rauch* da la cumischiun da la senda dal Quar manzuna: «No preparain ün'exposiziun cun

fotografias dal fabricat da la senda dal Quar, da la senda svesa e da la Val d'Uina cun sia regiun sulvadia, e perfin eir cun documaints da quel temp.» Cha quellas fotografias sajan variablas dal 20avel e dal 21avel tschientiner. El agiundscha cha la cumischiun, chi consista implü d'*Evar Benderer*, da *Victor Peer*, da *Georg Salomon* e da *Flurin Nuotclà*, haja preparà la festa dal giubileum daspö bundant ün on. Dürant quel temp hana tscherchà material per pudair ütilisar quel a la vernissascha: «L'archiv dal cumün da Sent, las gazettas, la Biblioteca chantunala e blers privats han miss a disposiziun fotografias e documaints.» Da la secziun da Pforzheim nun hana però survgni uschè bler material, perquai cha quel d'eira i a perder dürant la guerra mundiala. Dürant l'exposiziun vain preschantà eir il cudesch da *Cla Rauch*: «1910–2010/100 ons senda dal Quar in Val d'Uina» chi cuntogna texts istorics da la Val d'Uina, dals uors chi viavan là, dal fabricat da la senda dal Quar ed amo bler daplü insembel cun illustraziuns, documaints e contrats. *Cla Rauch* declera ch'el s'haja ingaschà pell'organisaziun dal giubileum da la senda dal Quar causa sia stretta colliaziun culla Val d'Uina e l'interess persunal.

L'inauguraziun da la vernissascha vain festagiada prosma sonda, ils 3 lügl da las 17.00 fin las 19.00 illa Grotta da cultura a Sent. In mardi, ils 6 lügl vegnan muossadas eir dias. L'exposiziun es visitabla mincha mardi e sonda fin ils 24 lügl. Dumengia, ils 11 lügl vain realisà l'act uffizial da la commemoraziun cun üna spassegiada ed attraziuns in Val d'Uina a partir da las 10.30.



La senda dal Quar.

FOTO C. RAUCH



Cla Rauch da la cumischiun da la senda dal Quar legia seis cudesch.

FOTO A. ZINI

Soluziun main privlusa

A la sava dal 20avel tschientiner s'haja tscherchà üna soluziun per ün viadi main privlus, plü cuort e plü pachific tanter l'Engiadina Bassa ed il Vnuost. Quella s'haja chattà in ün fabricat da gallarias davent d'Uina Dadaint, üna senda illa chavorgia dal Quar. L'iniziativa per quist fabricat es gnüda da la secziun Pforzheim dal Club Alpin Tudais-ch/Austriac. Ella ha tscherchà üna

via plü simpla per rivar da l'Engiadina a la chamonna Pforzheim illa regiun dal Pass da Schlingia. Da l'Engiadina nan gnivan nempe massa pacs viagiatoors, perquai cha'l viadi sur la muntogna d'eira massa lung. L'iniziant principal d'eira il docter *Adolf Witzemann* ed il patrun da fabrica il cumün da Sent. La fabrica ha dürà duos ons, nempe da 1908 fin a 1910.

41 giuvenils han fini lur scolaziun

Diploms da la scoula specialisada superiura da turissem

■ (anr/az) 41 giuvenils han fini ingon lur scolaziun da turissem a l'Academia Engiadina. Daniela Wünschner da Dietlikon es gnüda onurada pella meglra lavur da diplom. In sonda passada d'eira la festa da diplom stül Corvatsch ed il Badrut Palace a San Murezzan: Tuot ils absolvents han fat buns examens ed han survgni lur diploms. Ils plets festivs han tgnü *Michael Tamàs*, geolog diplomà e *Mark Steiner*, manader da gestiun da Line4Consult GmbH/Line5 Academy. La festa es gnüda imbellida cun tuns da violina, cun raquints illustrats d'üna diplomanta e cun chanzuns d'ün'otra diplomanta.

Scoula specialisada superiura da turissem

Matthias Bernhard, (Hagenbuch ZH);

Hans Bolt, (Turich ZH); Julia Bösch, (Ebnet-Kappel SG); Ursina Branger, (Felsberg GR); Marion Felber, (Lütisburg SG); Marion Frauchiger, (Hirzel ZH); Senta Gautschi, (Laax GR); Pascal Gebert, (Aadorf TG); Flavio Godenzi, (Pontresina GR); Marion Hediger, (Dietikon ZH); Regina Hermann, (Dresden D); Christina Hofer, (Dietikon ZH); Roman Hunziker, (Münchenbuchsee BE); Marisa-Angela Jud, (Turich ZH); David Kägi, (Dänikon ZH); Nina Kammer, (Goldach SG); Martina Käppeli, (Wädenswil ZH); Andrea Knecht, (Nidau BE); Nicole Köhler, (Dippoldiswalde D); Kerstin Kossatz, (Hamburg D); Meret Laener, (Basel BS); Franziska Müller, (Gränichen AG); Pascal Müller, (Wie-

sendangen ZH); Martina Nolfi, (Adliswil ZH); Kamolthip Polsombat, (Füllinsdorf BL); Kyra Reichmuth, (Schwyz SZ); Anita Roth, (Gümligen BE); Daniela Rupp, (Unterwasser SG); Martina Sager, (Seon AG); Katharina Scholz, (Chemnitz D); Birgit Slegers, (Schönenberg ZH); Virginia Spirig, (Widnau SG); Christian Steiner, (Wangen a.A. BE); Dominik Täuber, (Münchberg D); Anna-Kathrin Thür, (Altstätten SG); Eric Trinkler, (Allschwil BL); Kathrin Vonwiller, (Rothhausen TG); Evelin Walker, (Flüelen UR); Nancy Wiessner, (Pretzschendorf D); Daniela Wünschner, (Dietlikon ZH); Sonja Zimmerli, (Unterägeri ZG).



Las absolventas ed ils absolvents da la scoula da turissem a l'Academia Samedan han survgni lur diploms.

MAD



Sigi Hunn maina a partir da la stà il Restaurant Trü a Scuol.

FOTO B. STECHER

Nouvs fittadins pel Restaurant Trü

■ (anr/bcs) Sigi Hunn e sia parteneria *Odette Spycher* han surtut il Restaurant Trü a Scuol chi'd es situà sper il bogn avert e sper las piazzas da glatsch libras sur la posta a Scuol. Il restaurant dispuona da 110 piazzas da restoraziun ed es gnü surtut dal 1995 dal cumün da Scuol chi'd es hoz amo possessur da l'implant Trü. Ils nouvs fittadins, *Sigi Hunn* ed *Odette Spycher*, han manà divers ons il Restaurant Fontana a Sent. La surtutta dal Restaurant Trü es per Hunn üna sfida ed el es persvas cha cun grond ingaschamaint esa pussibel

d'avair success. «Sper üna bella paletta da specialitats culinarias n'ha eu l'intenziun da spordscher üna jada l'eivna üna sairada tuottafat particulara», disch el. Cha sco a Sent saja previs adüna la gövgia ün büfè cun specialitats engiadinaisas e grischunas cun musica. Chanzuns tradiziunals rumantschas e talianas dessan trategner ils giasts in möd cha quels vegnan a cugnuscher la cultura indigena culinaria e musicala. Hunn less eir spordscher per giasts dal bogn avert e dal sport sün glatsch trats favuraivels per mincha gust.